

項城縣志卷十

祠廟志

社稷壇

在城西門外壇制東西二十五尺南北亦二十五尺高

三尺或二尺一寸俱用營造尺四方陞各三級壇下前十二丈或九丈五尺東西南各五丈繚以周垣門四由北門入石主高二尺五寸方一尺刻其上去壇南二尺五寸正中埋之露圓尖神牌二以木為之高二尺二寸方四寸五分座高四寸五分寬八寸五分硃漆青字一書縣社之神一書縣稷之神每歲春秋仲月上戊日出主於壇南向祭之祭畢藏之

祭品

帛二

黑色

羊一

豕一

鉶一

籩四

棗栗

鹽藿魚

豆四

韭菹醢醢

菁菹鹿脯

簋二

黍稷

簋二

稻粱

爵三

儀注

三獻前後行三跪九叩首禮有受胙有望瘞

祝文 惟神奠安九土粒食萬邦分五色以表封圻育三農而
蕃稼穡忝承守土肅展明禋時屆仲春秋敬修祀典庶九九松柏
鞏磐石於無疆翼翼黍苗佐神倉於不匱尚饗

先農壇

在城東五里村北壇制與社稷同雍正四年奉文建紅

牌金字書先農之神每歲仲春亥日巳時致祭籍田五畝九分

在壇前祭畢知縣率屬官耆老農夫行九推禮

壇南有正廳三間東西配房各

一間或有司建
之為止息之所

祭品 帛一用白色餘同社稷壇

儀注同上

祝文 肇興稼穡粒我蒸民頌思文之德克配彼天念率育之
功陳常時夏茲當東作咸服先疇洪惟九五之尊歲舉三推之
典恭膺守土敢忘勞民謹奉彝章聿修祀事惟願五風十雨嘉

祥恆沐於神庥庶幾九穗雙歧上瑞頻書於大有

雲雨風雷山川壇

按舊志作風雲雷雨
誤今據會典正之

在城南關外明洪武初

令天下州縣祀境內山川後以雲雨風雷合祭後又以城隍合祭壇制由南入不設石主壇設三神位雲雨風雷之神居中山川之神居左城隍之神居右春秋仲月上戊日陳主北向以祭望燎不望瘞有受胙

祭品 中帛四左帛二右帛一俱白色餘並同社稷壇

祝文 贊襄天澤福祐蒼黎佐靈化以流形生成永賴乘氣機而鼓盪溫肅攸宜磅礴高深長保安貞之吉憑依鞏固實資捍禦之功幸民俗之殷盈仰神明之庇護恭修歲祀正值良辰敬潔邊豆祇陳牲幣

厲壇 在城北關外每歲清明日七月望日十月朔日晴時祭有

司先期牌告城隍至日奉神位壇上主之羊豕各一壇下左右設無祀鬼神牌羊豕各二解置於器以米三石為羹飯鋪設香燭酒紙如制附祀五人以報捍衛之功焉懷慶衛同知劉公義勇吳頂官舍袁公張公信陽衛百戶景端明正德六年守備項城時流賊剽攻城陷端死節焉事聞贈昭勇將軍指揮使附祀袁貴良少卿俊之子被流賊執不屈死事聞附祀

祝文 饒魂飄泊神無所依斷宗絕嗣久缺典禮或飄零於異鄉或沈埋於閭里凡守茲土代為淒其聊備牲醴羹飯靈其不昧是憑是依

文廟

崇聖祠並詳學校志 按名宦鄉賢忠義節孝四祠定制在學宮之旁今併附入學校志

關帝廟 在城西北隅始建未詳乾隆二十七年楊茂興趙景星重

修嘉慶六年知縣張丕緒倡捐創建三代祠三間於正殿後並建中門及客廳南對廳東西角門同治九年紳商重修

每歲春秋仲月諏吉及五月十三日聖誕致祭奏中和韶樂舞千戚翟籥之舞

春秋仲月祭品 帛一色白 牛一 羊一 豕一 籩十

豆十

五月十三日祭品 帛一色白 牛一 羊一 豕一 五果盤

儀注 三獻前後行三跪九叩首禮

祝文 浩氣凌霄丹心貫日扶正統而彰信義威震九州完大節以篤忠貞名高三國神明如在徧祠宇於寰區靈應丕昭薦馨香於歷代屢徵異蹟顯佑羣生恭值嘉辰遵行祀典延陳籩

豆几奠牲醪

後殿

光昭王正中

裕昌王東一室

成忠王西一室

俱南向

春秋祭品

帛各一色

羊各一

豕各一

遷各八

豆各

八

儀注 一獻前後行二跪六叩首禮

五月十三日禮祭供品與前殿同

祝文 世澤貽庥靈源積慶德能昌後篤生神武之英善則歸
親宜享尊榮之報追封王爵錫命攸隆肇修明禋典章俱備恭
逢諏吉祇事薦馨

文昌宮 舊在學宮南明嘉靖二十八年鄉官張承恩建萬厯四十八年知縣田唯嘉改建於城東南隅學宮左邑人馬斯和為記 國朝康熙二十七年知縣顧芳宗倡捐因舊趾擴其規模嘉慶十八年知縣侯蟠山重修

馬斯和記學之前舊有文昌閣當事者徹之以益尊經閣以故堪輿家稱巽方寥落其徵為人文不茂居久之諸生有志者各捐金鑄鐘構樓升諸城之東南隅巽峰插天人文稍稍興起然以不遵斯文主盟欲復舊制以大為振興道無由也客歲春侯以明經高第來治吾項駐旌方三月政成人和百廢俱興暇時課諸生藝於尊經閣師生駢集相與論今昔因革而徐申復建文昌閣之議侯慨然曰道以人弘徹文昌閣以益尊經憂及人文何經之尊必復之無疑也於是鳩工聚材卜建於舊址之東

會天淋雨工未及竟而侯以禮經分校棘闈復以卓異代攝淮陽守未幾兩臺合疏請命調補開封祥符令侯於項直傳舍視之即項士亦僉謂不能必有成勞乃侯嚴諭督役者曰速畢爾工程吾必不令於項有不結之局且必不令吾子弟有望而不被之恩蓋侯語未脫口而百役感激鼓舞不踰月而閣成閣制闊一丈二尺長二丈七尺高三丈軒敞偉麗較昔有加焉是役也當累歲災荒之餘材木輒石三倍其值而侯不惜且其一絲一粟不取諸公帑贖鍰無幾何悉出以資經費尤不以怯也閣既成博士王君家賓王君址王君憲諸生王嘉猷姚自修李宗昉來徵余言以勒諸石余惟文昌閣之徹也幾三十年握符茲土者閱數十主率皆等為道旁築舍蔑有成績侯治項而又什四攝淮陽什二校棘闈所得視項事者五六月爾而獨能提綱

挈領復三十年久湮之制其所為羽翼斯文作新項士者厥功茂矣故不辭而為之記侯諱唯嘉號陸海直隸饒陽人丙辰進士

每歲春秋仲月上戊日及二月初三日致祭牲牢祭器並同關廟

祝文 神功赫奕聖德昭明位分天象職司台衡朱衣赤舄耀於七星贊元開化啟秀育英普天欽仰斯文丕興今屆仲春秋薦豆登

奎星樓 在文昌閣前康熙二十五年知縣顧芳宗捐俸創建乾隆六年知縣錢國寶改建於東南隅城上邑人張延福為記張延福記項近義皇故都枕頓嶺帶虹流地僻而脈秀自漢以來名儒輩出固以地靈煥人文亦由人力培地氣形家言豈盡

誣耶歷觀直省郡縣有關文教者孔廟而外必推文昌次則歷
惟魁神載在祀典士大夫多虔奉之前明萬歷間邑侯王公初
奉神於青雲樓迨後歲久祀廢其鐘樓之建於巽地則自維揚
田公始旋亦毀於兵燹康熙丙寅始甯顧父師因重葺文昌宮
並構樓於前以祀魁神又以巽方寂寥復建鐘樓於雉堞之巔
以迎佳氣詎甲子辛未以後宴革久虛釋褐邈聞蜺國者每歎
士風之不振高安劉父師謀諸紳士撤鐘弗鳴另肖神像於青
雲樓嗣是人文漸有起色然究未若前代之濟濟稱盛也夫吾
儒任理不任數而數究不離乎理鐘金聲也巽木行也木地金
鳴理實相尅其撤而去之也固宜若青雲樓當縣治五達之衢
塵市擾攘果何所取義而奉神於斯耶嘗考漢誌魁方杓曲蓋
斗首四星也斗戴筐六星曰文昌是魁星原與文昌相比附昔

之祀於帝君前也理本可通特其地湫隘未足以暢文明之氣耳厥後二三學士遷舊魁神於故鐘樓其地仍近文昌宮而爽塏則有加焉望氣者皆以為吉顧神像雖移久已剝落不華樓亦傾敝崩裂日就頽廢識者憂之躬逢

聖天子崇儒重道

慎選文臣守郡縣於是滇南錢父師以巍科久宦承乏來茲土凡有關於民風士氣者莫不加意振興爰於是夏詢諸紳士謀所以妥魁神者慨然興作且捐薄俸以為首倡而學師楚君諱芬與高子應旂閣子壇等更為設簿遍告同人適右齋王君諱中者亦奉簡命來秉項驛共勲盛舉爾迺鳩工庀材循鐘樓之故址為魁閣之偉觀坐巽面乾遙拱類壁高若干丈廣若干尺工費集腋於多士而丈二金身則閣子壇所獨任也經始於八月越兩月而告成工既竣囑余為記余以讀禮故方以未

獲勲事為歎豈碑陰八字尚以不文辭且是役也直以人力培地氣行見人文蔚起輝映前哲則侯之功垂不朽而諸君子之樂善急公亦得與頌嶺虹流共久長矣是烏可無言以記歲月因不揣固陋次其顛末如此

按奎星之祀會典作奎此記作魁先儒說亦不一故并存之

每歲春秋二仲上丁日致祭

祝文 七星冠首六合承輝德耀青陽祐人才之奮起祥開紫電煥文運之光昌天象昭臨士林忭慶敬修禋祀肅展微忱

城隍廟

在北大街路西宋廣濟院遺址明宣德間典史劉鏞創

建成化二十三年知縣吳椿年增修嘉靖四十五年知縣魏勳構亭門為更衣處教諭蕭文元為記康熙二十八年知縣顧芳宗捐俸重修光緒十五年善士閻松年協紳民重修

節錄蕭文元記廟在舊治東北五十里古項子城今廟則宣德

中城避河患南徙殄寇鎮與治同建者也其址為廣濟故院院地敞甚殆數畝廟制草創弗稱正統丁卯邑令張顯拓而葺之中為神祠為拜亭前為門為外門後為寢宮左右為兩廊各三楹稱備制矣而記缺成化乙巳邑令吳公椿年復增葺之而記弗詳時民居未徧廟虛左側閱數十禩生齒日繁比屋鱗次居民漸逼廟矣祝者某仰賂於衆縱民侵其左隙隙窮而敞者隘舊觀既失廟屋滋久且圯矣嘉靖丙寅魏公奉命來尹項謁廟睹狀懼無以妥神棲延祀典也欲更葺焉而未即圖明年丁卯為萬厯改元之歲公政既通歲且大稔乃集父老於庭議更葺並詢隘所由父老言狀因拱手曰茲役也殆神借公之靈譴祝也遂逮祝者於理復左側侵地若干並拓左側之隙各繚以崇垣樹以松檜以杜其侵木朽易以堅瓦毀易以新彩繪剝落益

其飾故者完矣計齋宿無所也度門內之隙地營而亭之亭成計守者無其人也度寢側之隙廬而宅羽士焉役告竣矣又明年己巳公以榮擢民部主政瀕行父老請記顛末勒於石

八蜡祠

舊在縣署西知縣王欽誥重修歲久全廢順治十七年知縣黃陞改建草祠三間於大吉寺西旋圯康熙二十六年六月內飛蝗蔽天遍集郊野知縣顧芳宗率領士民竭誠步禱旋即消散並未食禾隨創建瓦祠三間於舊址設木主八座嗣後他境屢有蝗災獨不入項境僉以為誠之所感云乾隆三十九年蔣元勳高師龍倡衆重修

每歲春秋上戊日統祭八神一先嗇二司嗇三農四郵表畷五貓虎六防七水庸八昆蟲

祭品同社稷壇

儀注 一獻前後行一跪三叩首禮

祝文 於惟尊神實司歲功驅螫斂騰五穀乃豐茲當歲禴虔具犧牲神其保佑惠此生靈

劉猛將軍廟

雍正三年

詔旨特祀與八蜡同

蔣志云祀猛將

軍劉承忠從直隸總督李維鈞之請也謹按禮部則例神元時官指揮能驅蝗元亡自沈於河世稱劉猛將軍會典通禮並同又按亳州志雍正二年兩江總督奏劉猛將軍以驅蝗著有靈異請封揚威侯令州縣建廟是今之所祀確非劉騎不必引怡菴錄自闢疑竇也至或云劉宰或云劉銳則前賢已有非之者附會之談益無足辯已

每歲正月十三日冬至後等三戊日祭

祝文 上贊帝德下惠生民時和年豐蝻蟥不興茲值歲暮式

薦明馨神其昭格庶幾鑒歆

火神廟 在蓮溪書院西

每歲正月十三日祭項舊以正月初五日祭

祝文 位居離方德應坎宮佐聖化以流行生成永賴秉氣機而鼓盪溫肅攸宜茲值誕辰謹以牲醴庶品用伸

馬神廟 舊在縣署西知縣王欽誥修後圯知縣張應宏重建於北門西福勝寺之右乾隆三十九年蔣元勳高師龍等重修今在衙署左偏

每歲春秋仲月上戊日致祭

土地祠 舊在縣署宜門前左祠一閒年久傾圯今在學宮右

每歲春秋仲月次丁日致祭

祝文 幽司公署赫奕無私威庠碩鼠德符騶虞今屆仲春秋禮

宜致祭

以上祀典各縣所同均依大清會典開載惟龍神春秋仲月辰日致祭孚佑帝君乾隆十五年奉文通祀縣獨

如闕

陳子禽祠

在南頓東北光武殿左

春秋致祭

統文 派衍公族實鍾義域之秀靈躬列聖門親承尼山之教
化溫良探聞政之原明君臣之契合有自詩禮詳過庭之訓知
父子之授受無私茲屆仲春秋爰舉祀典神其格歆

光武廟 一在城北五十里南頓東北光武臺上臺相傳為建武
十九年光武幸南頓所築廟不知建自何時宋知縣江瀉裕重
修張采記記文無攷明永樂六年韓得春重修嘉靖元年商人
汪恪捐資增修知縣何廷俊申請蒙學使呂公邦耀奏請列入
祀典 國朝康熙二十九年知縣顧芳宗重修有記後有汪崧
等重修上蔡程元章為記劉濟川重修拜殿知縣繆庭槐為記
一在城西北忠義冢萬厯二十四年知縣王欽誥增修康熙
二十二年知縣顧芳宗重修祭品與南頓廟祀同